


ALAHADY FAHA 23 MANDAVANTAONA - B



“« Tsara avokoa ny zavatra rehetra nataony, fa nampalady ny marenina lzy sy nampiteny ny moana » (Mk. 7: 37)“

Ry Kristianina havana, anio alahady faha-05 n'ny volana septambra no idirantsika amin'izao fanjava vaovao izao ary mitondra amin'ny fanokafana amin'ny fankalazana ny faha-120 taonan'ny eglizy trano Masina Misely Arkanjely eny Joffre Ville ary indrindra hanokafantsika ny SINAODA ka hiarahantsika mamakivaky ny fiainantsika izany hoe HIARA-DALANA isika handinika ny fiainantsika mba hahafahantsika manao “départ vaovao” ao anatin'ny Pantekoty vaovao.

Misy fotoana eo amin'ny fiainantsika iatrehana zavatra maro mifamahofaho sy manahirana ary mahakivy ka very fanahy mbola velona isika miatrika ireny zava-misy mikiky ny fiainantsika mampitebiteby antsika ireny. Lazaina izany fa indrindra isika miatrika izao fiainana mangidy amin'ny maro izao. Izany indrindra anefa no mahatonga antsika entanin'ny finoana, sy fanantenana ary fitiavana araka ny averimberintsika : OLOM-PINOANA ISIKA, OLON'NY FANANTENANA, OLOM-PITIAVANA manatanteraka izao SINAODA izao mba hanome aim-baovao entanin'ny Fanahy Masina ka ahafahantsika miroso ho EO V MISIONERA VITA BATEMY KA IRAHINA HO TABERNAKLA VELONA MANORINA ETA. Miandrandra fihavaozana tokoa isika hanafaka antsika amin'izay mamatopatotra

rehetra. Feno toky isika satria tsy Andriamanitra lavitra araka ny voalazantsika matetika ihany koa ny Andriamanintsika fa Andriamanitra akaiky sy miara-dàlana amintsika mandrakariva. Nanolotra ny ainy ho fanavotana antsika sy mikarakara ary mikolokolo antsika ny Andriamanintsika. Izany ny tian'ireo vakiteny telo

Vakiteny I : Iz. 35, 4-7a

Tononkira : Salamo 145

Vakiteny II : Jak. 2, 1-5

Evanjely : Mk. 7, 31-37

asongadina amin'izao Alahady faha-23 tsotra mandavantaona izao handalinantsika ny finoantsika fa indrindra ny fiatrehintsika izao KORONTANAVIRUS izao ka hanaovantsika “départ vaovao”, hiaradana amin'izao sinaoda izao. Raha atao amin'ny teny hafa dia azo raisintsika miatrika izao KORONTANAVIRUS izao tahaka ny “eksaody” manala antsika amin'ny fanandevozana maro isankarazany ka mitondra antsika amin'ny fahafahana, fivelarana. Azo lazaina fa tena lalam-panavotana ho antsika raha samy fola-kevitra isika. Tsy afenina fa indraindray maro ny olana tsy maintsy

sedraina, mampianatra antsika ny Tenin'Andriamanitra fa Andriamanitra miara-dàlana amintsika mandrakariva fa indrindra ny vakiteny voalohany ao amin'ny bokin'Izaia mpaminany, *"Ilazao ny mitebiteby fo ataovy hoe: Makà hery fa aza matahotra."* Maro no mety manahirana antsika fa ny Andriamanintsika dia mikolokolo sy manasitrana antsika, izany koa ny voalazan'ny Evanjely androany ; namakivaky tànana maro i Jesoa, mamakivaky ny fiainantsika izy ka raha mampiditra sy mampandroso azy eo anivon'ny fiainantsika isika dia ireo zavatra manahirana antsika voalaza tahaka ilay moana sy marenina ao amin'ny evanjely dia hositrinin'Andriamanitra. Maro ny zavatra "mahamoana" antsika sy mahatonga ny sofintsika tsy mitandregny, maro ny zavatra tsy tandregnesantsika satria araka ny voalaza teo dia isika tsy miaraka amin'Andriamanitra. Manatona antsika Andriamanitra milaza hoe "Efata", izao koa no hanokafan'Andriamanitra ny sofintsika sy haniratany ny masontsika, izany no antenaintsika ho tena vokatry'izao SINAODA izao tohin'ilay filankevitra pastoral ny niarahantsika nanao ka ny anjarantsika dia ny mampiditra an'Andriamanitra amin'ny fiainantsika mba hiara-dalana Aminy isika. Ny dikan'ny SINAODA izany mira MIARA-DALANA.

Sokafin'Andriamanitra ny masom-pinoantsika sy ny masom-panahintsika, marary ny tontolo telo iainantsika izay fototra ny maha-olona, azo lazaina aza fa mahajamba antsika ka tsy hahitantsika intsony ny lalan-kombana ka manasempotra ny sofintsika izay tsy andrenesantsika ny hafatry ny konsiansy izay maha olona antsika, tsy hoe feon'ny fieritreretana fotsiny ny konsiansy fa tena ny maha olona antsika mihitsy, izany no tena ny dikan'ny hoe "konsiansy". Ireo tontolo telo dia sempotra sady marenina no jamba ka very fanahy mbola velona isika izany hoe ny mahaolona mihitsy no potika. Milaza miara-mahita isika milaza izany rehetra izany satria isan'andro vaky isika no mahita ireny tontolo iainana, ny zavaboary maratra ka zary "fahavalo" mandripaka tanana sy olona maro na amin'ny alalan'ny hain-tany mahatsiravina na amin'ny alalan'ny rian-drano manimba tanana na amin'ny alalan'ny horohoron-tany na tsunami ... Tsy miafina amintsika ihany koa ireny herisetra eo anivon'ny fiaraha-monina, eo anivon'ny fianakaviana ... ka zary valifaty no fenitra. Tena lavitra Andriamanitra satria ny vola sy ny fitiavan-tena no manjaka ka potika tanteraka ny tontolom-pinoana.

Rentsika ny hiakan'ny tontolon'ny zava-boahary manodidina antsika izay efa mitaraina ary mahatsiaro ho potika. Eo indrindra no iantsoana antsika amin'ny alalan'ny vavaka sy ny dinika entin'ny SINAODA ka hanaovantsika, EFATA, izany hoe misokatra ny masontsika, ny sofintsika ka hiezaka isika hikolokolo ny tontolo iainantsika. Fa raha voakolokolo tsara izany dia hivelatra ny fiainantsika. Izany ny dikan'ny loko maintso, feno fanantenana isika. Iza no fotoana tsara hiezahantsika amin'izany fanavaozana izany satria taranaka mpanorina isika ka hikolokolo sy hanaja ny tontolo iainantsika. Io no vòkasiontsika hatramin'ny naharian'Andriamanitra antsika. Raha tanteraka tokoa izany vokatry ny fiovam-penitra mahery vaika eo anivon'ny fitondran-tenantsika. Raha tanteraka izany dia afaka hilaza isika tahaka ao amin'ny bokin'I Jenezy fa tsara avokoa ny zavatra rehetra nataon'Andriamanitra satria nampiteny ny moana izy no nampalady ny marenina. Tsy hanao tahaka ny taloha intsony isika fa hanavao ny fiainantsika ka hanaja ny tontolo iainana.

Toy izany koa ny tontolom-piainantsika, raha misokatra tokoa ny fo amam-panahintsika araka ny voalaza teo nosokafan'i Jesoa ny fontsika, masom-piainantsika dia hifanaja isika, hampanjaka ny rariny sy ny hitsiny, hikatsaka ny soa indrindra ary hiezaka hatrany hanitatra ny fihavanana

ampianaran'Andriamanitra ao anatin'ny fifankatiavana, izany hoe "fihavanana sady kristianina no malagasy". Tontolom-piainana hanjakan'ny fifankatiavana tokoa ka hisokatra ny fiainantsika. Aoka hamboly famindram-po, sy fifamelan-keloka isika izay loharano sy fototry ny fandriam-pahalemana sy fihavanana. Io no manambara fa misokatra ny "masontsika". Tsy ho hisy ireo raha tsy mivelona ny fahafoizana sy fanompoana entina handresena ny fitiavan-tena sy avonavona ary ny fialonana isika.

Toy izany koa ny tontolon'ny fiainam-pinoana izay hivelomantsika ny maha zanak'Andriamanitra antsika ka hiverina amin'ny toetra naharian'Andriamanitra antsika dia ny hitovizantsika endrika Aminy. Izany no fanasitranana andrandraintsika avy amin'i Jesoa ka hahatonga antsika hila-bava tahaka ireo olona nahita azy talanjona ka nilaza hoe "*tsara tokoa ny zavatra rehetra nataony, nampalady ny marenina izy sy nampiteny ny moana*"

Ny hivelomantsika izany rehetra izany fa indrindra isika miatrika izao SINAODA izao. Io ny toe-panahy tsy maintsy manentana antsika raha tiantsika ho hisy vokatra ny dinika rehetra ataontsika.

Mananatra antsika koa I Md Jakoba ao amin'ny vakiteny faharoa mba tsy hizaha tavan'olona, mba tsy hisy fanilikilihana. Ny finoana an'I Kristy tokoa dia tsy mba manilika fa mampiombona, mampiray ary izany no mahatonga antsika ho fianakaviamben-janahary ao anatin'ny Tranobe lombonana dia ity tany ity ka ny vokasiontsika dia ho taranaka mpanorina ary ao anatin'ny fanorenana irery ihany fa tsy amin'ny alalan'ny fandravana no mitondra antsika hihavao ary noho isika mihavao dia afaka manavao ny zavatra rehetra araky ny hira izay ataontsika hoe: "Ry Tompo Andriamanitra Andriananahary ..." Azo lazaina fa io hira io no mamintina ny toe-panahy entintsika miatrika ny SINAODA.

Ry Jesoa Tompo ô ianao namakivaky ny tãnana, koa enga anie hamakivaky ny fiainanay tsirairay, ny fiainan'ny fianakaviana eglizy kely, hamakivaky ny eglizy iombonana, hamakivaky ny eglizy fototra koa lanao fa indrindra amin'izao SINAODA izao ka hizara ny fahasoavanao hanokatra ny masonay sy sofinay mba hahare ny hafatrao. Enga anie ianao hamakivaky ny firenenay amin'izao fotoan-tsarotra izao ka hiova ny fonay, hosokafanao tokoa ny fonay ka hitoetra ao Aminao.

Ry Jesoa Tompo ô, matetika izahay manakotra ny masonay sy ny sofinao ka tsy maheno ny antsom-pitiavanao, eo koa ny henatra sy ny tahotra ka mahatonga anay tsy ho vavolombelona, izao anefa ny fotoana tsara, izao no androm-pahasoavana ka sokafy ny fiainanay mba ho fiainana misy anao tokoa Enga anie lanao hitoetra eo anivonay ary izahay hitoetra eo anivonao ka hamokatra ao anatin'ny fiadanana sy ny hafaliana mba hahatonga anay tokoa ho zanak'Andriamanitra, ho EOVI MISIONERA VITA BATEMY KA IRAHINA HO TABERNAKLA VELONA. Masina Maria Reninay ô, Renin'ny Eglizy mivavaha ho anay mba hanana fo misokatra mandrakariva amin'Andriamanitra izahay fa tsy sanatria hikatonana kosa amin'ny ratsy mandrendrika anay. Md Josefa Ray Mpiaro ny Eglizy Erantany ampio izahay mba tsy voafitaky ny rendrarendran'izao tontolo izay mitady mandrakariva handrakotra ny masonay sy ny sofinay. Tohano izay hisokatra amin'Andriamanitra mandrakariva ka hanana nofy vonona handavorary ny fiainana miaraka amin'Andriamanitra fa indrindra amin'izao sinaoda izao. Amen

Mompera Arseveka Mgr Benjamin Ramaroson